
ՀԱՅԵՐԻ ԲՈՒՆԻ ԻՍԼԱՄԱՑՄԱՆ ԵՎ ՄԱՀՄԵԴԱԿԱՆՈՒԹՅՈՒՆ
ԸՆԴՈՒՆԵԼՈՒ ԴԵՊՔԵՐԸ XIV–XV ԴԴ.
(Հայաստանի հարավային շրջանների օրինակով)

ԳՈՌ ԵՐԱՆՅԱՆ

Քրիստոնեության ու իսլամի տարածումով աշխարհը երկփեղկվեց կրոնական երկու խոշոր համայնքների միջև: Որպես հետևանք՝ էթնիկ ինքնությունն աստիճանաբար երկրորդվեց կրոնական պատկանելությանը, կրոնական ինքնագիտակցությունը գերիշխող դարձավ, մի բան, որ միջնադարի գլխավոր առանձնահատկություններից էր: Հայաստանում քրիստոնեության ամրապնդմանը զուգընթաց «հայ» և «քրիստոնյա» բառերը դառնում են համարժեքներ. քրիստոնեությունից հրաժարումն ու իսլամ ընդունումն ընկալվում էր որպես ազգուրացություն, էթնիկ ակունքներից օտարացում:

Արդյո՞ք շատ են հայերի՝ մահմեդական դառնալու ու բռնի իսլամացման դեպքերը և արդյո՞ք դրանք Հայաստանի էթնոժողովրդագրական պատկերի փոփոխության վրա լուրջ ազդեցություն ունեցել են: Այս հարցերի պատասխանը ստանալու համար փորձենք XIV–XV դդ. կտրվածքով վեր հանել Հայաստանի մահմեդական նվաճողների կրոնական քաղաքականությունը, ինչպես նաև ներկայացնել Հայաստանի հարավային շրջաններում մահմեդականության ընդունման մեզ հայտնի դեպքերն ու քննել դրանց պատճառները:

Մոնղոլները, որ գրավեցին Հայաստանն ու շուրջ մեկուկես դար իշխեցին, ո՛չ քրիստոնյա էին, ո՛չ էլ մահմեդական, ո՛չ էլ փորձում էին իրենց հնագույն հավատալիքները՝ պարտադրել հպատակներին, այլ քաղաքական նկատառումներով, երբեմն էլ ներքին մղումով հակվում էին այս կամ այն կրոնին¹: Ֆրանսիացի պատմաբան Կ. Կահենը

¹ Լ. Գումիլյովը մոնղոլների կրոնի մասին գրում է, որ այն ունեցել է հստակ ձևավորված աշխարհայացքային մոտեցում: Հեղինակն առանձնացնում է աստվածադավանությունը՝ որպես մոնղոլների հնագույն պաշտամունք, և շամանությունը, որը ծագել է Մանջուրիայում, այնուհետ թափանցել մոնղոլական միջավայր: Ըստ նրա՝ սխալ է մոնղոլների կրոնը շամանություն անվանել (տե՛ս Լ. Н. Г у м и л е в. Поиски вымышленного царства. М., 1970, с. 279–301):

² Ուշագրավ է Ոսկե Հորդայի տիրակալների կրոնական ուղղվածության բազմազանությունը. Բաթուն հարում էր շամանության, նրա որդի Սարթախը՝ քրիստոնեության, իսկ Բերկեն ընդունել էր իսլամ: Ընդ որում՝ վերջինիս կողմից իսլամ ընդունելը բացատրվում է միմիայն քաղաքական նպատակներով (տե՛ս М. А. У с м а н о в. Этапы исламизации Джучиева улуса и мусульманское духовенство в татарских ханствах XIII–XVI веков, Духовенство и политическая жизнь на Ближнем и Среднем Востоке в период феодализма. М., 1985, с. 178):

գրում է, որ, ընդհանուր առմամբ, մոնղոլների առաջին սերունդները անտարբեր էին կրոնների նկատմամբ³: Քրիստոնյա աշխարհը, այդ թվում և հայերը փորձեցին մոնղոլներին հրամցնել Հիսուս Քրիստոսի ուսմունքը: Երկար ժամանակ մոնղոլները լսում էին տարբեր կրոնների քարոզիչներին, իսկ արդեն Ղազան խանը (1295–1304), որը բուդդայական կրթություն էր ստացել, ընդունեց Մահմուդ անունը ու դարձավ մահմեդական⁴: Նա իսլամ ընդունեց՝ առաջնորդվելով քաղաքական նպատակներով, ինչքան էլ նրա վեզիր, մահմեդականություն ընդունած հրեա ընտանիքի գավակ Ռաշիդ ադ-Դինը փորձել է դարձին կրոնական երանգ հաղորդել⁵: Ղազանի մահմեդական դառնալը խիստ բացասաբար ընդունվեց Բյիսանության մաս կազմող Հայաստանում:

Հետագոտողները համակարծիք են այն հարցում, որ Ղազանի դարձի գործում մեծ դեր է ունեցել նրա զորավարներից Նովրուզը, որ հայտնի էր քրիստոնյաների նկատմամբ իր ասելությամբ: Ս. Օրբելյանը հենց նրան է վերագրում քրիստոնյաների նկատմամբ Բյիսանության հարուցած հալածանքներն ու բռնությունները, տարբեր երկրամասերում եկեղեցիների ավերումը և այլն⁶: Ժամանակի հայ մատենագրությունն ու ձեռագրերի գրիչներն իրենց հիշատակարաններում անմիջապես արձագանքում են մոնղոլական իշխանությունների կրոնական քաղաքականության փոփոխությանը: 1295 թ. հետո հայերեն ձեռագրերի հիշատակարանները պարբերաբար բողոքում են «նետողական ազգի»՝ մոնղոլների, վարած քաղաքականությունից: 1297 թ. գրված հիշատակարաններից մեկում կարդում ենք. «Ի չար և ի դառն ժամանակիս, ի բռնակալութեանն Խազանին, որ բազում եկեղեցիք աւերեցան և բազում հայրապետք և քահանայք և ժողովուրդք ի սուր ս[ուս]երի մաշեցին և գայլս գերի [տարան]»⁷:

Ղազան խանը շուտով հրաժարվում է քրիստոնյաներին հալածելու քաղաքականությունից, արքայրում է այդ հարցում նախանձախնդիր Նովրուզին և լծվում երկրում ռեֆորմների իրականացմանը⁸՝ նպատակ ունենալով ամրապնդել կենտրոնական իշխանությունը: Արդեն 1300 թ. կարինցի մի հայ Ղազան խանին կոչում է «բա[րե]լպաշտ և խնամարկու ազգիս քրիստոնեից», և հայտնում՝ թեպետ նա մզկիթ է գնում, սակայն

³ С. С а h e n. La Turquie pré-Ottomane, Istanbul, 1988, p. 321.

⁴ Ղազան խանի՝ մահմեդականություն ընդունելու դրդապատճառների մասին տե՛ս С. Melville. Padshah-i Islam: The Conversion of Sultan Mahmud Ghazan Khan, Pembroke papers 1, 1990, pp. 159–177.

⁵ Р а ш и д - а д - Д и н. Сборник летописей, т. III, пер. с перс. А. К. Арндса. М.–Л., 1946, с. 162–164.

⁶ Պատմութիւն նահանգին Միսական, արարեալ Ստեփաննոսի Օրբէլեան արքեպիսկոպոսի Միւնեաց (այսուհետև՝ Ս. Օրբելյան), Թիֆլիս, 1910, էջ 472–473:

⁷ Հայերեն ձեռագրերի հիշատակարաններ, ԺԳ դար (այսուհետև՝ ԺԳ դար), կազմեց՝ Ա. Մաթևոսյան, Երևան, 1984, էջ 810:

⁸ Ղազան խանի ռեֆորմների մասին տե՛ս Լ. Հ. Բ ա բ ա յ ա ն. Հայաստանի սոցիալ-տնտեսական և քաղաքական պատմությունը XIII–XIV դարերում, Երևան, 1964, էջ 504–524:

«գսերն և զգութն ունի առ ազգս քրիստոնէից»⁹: Չի կարելի մտածել, որ գրիչը գովաբանում է Ղազանին նրա իրականացրած ռեֆորմների համար, ամենևին, նա չի մոռանում նշել, որ հարկապահանջությունը սաստիկ է, և երկրում սով է սկսվել¹⁰: Բանն այն է, որ Ղազանի կառավարման երկրորդ շրջանում քրիստոնյաների նկատմամբ հալածանքները դադարել էին:

Դրությունը փոխվում է, երբ իշխանության է գալիս նրա եղբայրը՝ մկրտությամբ քրիստոնյա՝ Նիկոլաս անվամբ¹¹, երիտասարդ հասակում բուդդայականություն ընդունած, այնուհետև իսլամի սուննի ուղղության հետևորդ դարձած և հետագայում իսլամի շիա ուղղությունը պաշտոնական կրոն հռչակած Մուհամմադ Խարբանդա (Խուդաբանդա) Օլջեյթու իլխանը (1304–1316)¹²: Եթե Ղազանի մասին, չհաշված նրա կառավարման առաջին տարիները, հայ հիշատակագիրները հիմնականում դրական են արտահայտվում և նույնիսկ ցավում նրա մահվան համար, ապա միանգամայն այլ է նրա եղբոր նկատմամբ գրիչների վերաբերմունքը: Հիշատակագիրները հենց նրա անվան հետ են կապում մոնղոլների իսլամ ընդունելը: Պատահական չէ, որ XIV դ. սկզբի հայերեն ձեռագրերի հիշատակարանները մեկը մյուսի հետևից դառնությամբ արձանագրում են, որ «նետողական ազգը» հեռացել է իր հայրենի հավատից և հետևել «չար աղանդոյն կարապետ նեռին Մահմետի»¹³: Հայկական սկզբնաղբյուրները վկայում են, որ իսլամ ընդունելուց հետո մոնղոլները սկսել են հալածել քրիստոնյաներին՝ ցանկանալով վերացնել քրիստոնեությունը Հայաստանում ու Վրաստանում¹⁴: Նրանք նաև հրամայում են ոչ մահմեդականներին տարբերակիչ նշաններ կրել¹⁵: XIV դ. սկզբին, որպես մոնղոլների քաղաքականության արտացոլում, հիշատակարաններում անընդհատ պատվում են հետևյալ տողերը. «Բռնադատեն զամենեսեան դառնալ ի սնտի և ի պատիք յոյսն իւրեանց, հալածեն, նեղեն և տառապեցուցանեն՝ զոմանց զինչսն յափշտակելով, զոմն տանջելով, զոմն հայիոյելով, զիսաչ և զեկեղեցի նախատելով»¹⁶:

Աղբյուրները միաբերան պնդում են, որ Խարբանդան հրովարտակ է արձակել և հրամայել կամ «դառնալ ի մոլար օրէնսն Մահմեդի և կամ տալ խարաջ ամէն մարդ իւ-

⁹ ԺԳ դար, էջ 861:

¹⁰ Նույն տեղում:

¹¹ Ս. Օրբեյանը նշում է Թեոդոսիոս անունը (Ս. Օրբեյան, էջ 482):

¹² Տե՛ս Օլջեյտի, Il-Khanid ruler of Iran Encyclopædia Britannica, <http://www.britannica.com/biography/Oljeitu>:

¹³ ԺԴ դարի հայերեն ձեռագրերի հիշատակարաններ (այսուհետև՝ ԺԴ դար), կազմեց՝ Լ. Խաչիկյան, Երևան, 1950, էջ 51:

¹⁴ Նույն տեղում, էջ 46:

¹⁵ Նույն տեղում, էջ 47:

¹⁶ Նույն տեղում, էջ 41:

րոյ գլխոյն Ը (8) դահեկան»¹⁷: Այսպիսով, նա վերականգնում է դավանանքի համար քրիստոնյաներից գանձվող ջիզյա հարկը, իսկ այն չվճարելու դեպքում քրիստոնյաները պետք է մահմեդական դառնային: Խարբանդան, տեսնելով, որ ժողովուրդը չի ընկճվում ծանր հարկերից ու դառնությունից, հրամայում է «կամ զամենեսեան ներքինիս առեալ, կամ զմի ակն հանել, կամ դառնալ ի կրօնն Մահմէտի»¹⁸:

Կարինում մոնղոլների հարկահանության մասին պատմող մի ձեռագրում նույնպես ասվում է, որ քրիստոնյաները կամ պետք է «խարաճ» վճարեին, կամ ուրանային իրենց հավատը և դառնային մահմեդական¹⁹: Աղբյուրի հաղորդմամբ՝ մարդիկ նախընտրում էին ծանր հարկապահանջությունը ու չարչարանքները մահմեդական դառնալուց: Շատերն էլ, չկարողանալով վճարել հարկերը, լքում էին հայրենի բնակավայրերը. «Բազումք տարագիրք եղեալ վասն հարկին»²⁰: Այնուամենայնիվ, գրիչ Սարգիսը 1314 թ. տրտմությամբ գրում է, որ Կարին քաղաքի բնակիչներից ոմանք մահմեդական են դարձել. «Ի դանութեանն ազգին Բամաելացոց Խարպանդաին, ի նեղ և ի դառն ժամանակիս, որ անգաւ ազգս Հայոց ընդ լծով հարկի, և չկայ յոյս ապաւինի և ոչ տեղի ապաստանի. և էր աշխարհ յամենայն ի տառապանք և ի յարկապահանջութիւն. և իսպառ նուազեալ էր ազգս Հայոց: Եւ ի քաղաքիս յայսմիկ քակեցին եկեղեցիք բազում, և ոմանք, թողեալ զհաւատս որ ի Քրիստոս, և գնացեալ զհետ անօրինաց Բամաելացոց ազգի»²¹: Ժամանակագիրներից մեկն էլ փաստում է, որ շատ մարդիկ մահանում են «վասն անուան Քրիստոսի», շատերն էլ դառնում են մահմեդական. «Եւ բազումք զանգիտեալ դարձան ի կրօնս նոցա»²²: Մեզ հայտնի վերոհիշյալ դեպքերում մահմեդականացման պատճառներն են եղել ինչպես բնակչության նյութական հնարավորությունները գերազանցող հարկերը, այնպես էլ հալածանքները: Հատկապես մեծ դեր էին խաղում հարկերը, որոնք այնքան ծանր էին, որ Կարինում մահմեդականացման մասին ավանդող գրիչը վկայում է, որ մարդիկ ստիպված վաճառում էին սեփական երեխաներին²³: Ուշագրավ է, որ Սամվել Անեցու շարունակողներից մեկը մահմեդականության ընդունումը հավասար է համարում թուրքանալուն²⁴:

¹⁷ Մանր ժամանակագրություններ, XIII–XVIII դդ., հ. II, կազմեց Վ. Հակոբյան, Երևան, 1956, էջ 381:

¹⁸ Սամուել Անեցի և Շարունակողներ, ժամանակագրութիւն, աշխատասիրությամբ Կ. Մաթևոսյանի, Երևան, 2014, էջ 271–272:

¹⁹ Հայոց նոր վկաները (1155–1843), աշխատութեամբ՝ Յ. Մանանդեանի եւ Հ. Աճառեանի, Վաղարշապատ, 1903, էջ 121–122:

²⁰ Նույն տեղում, էջ 122:

²¹ ԺԴ դար, էջ 101–102:

²² Սամուել Անեցի և Շարունակողներ. նշվ. աշխ., էջ 272:

²³ ԺԴ դար, էջ 102:

²⁴ Սամուել Անեցի և Շարունակողներ. նշվ. աշխ., էջ 271:

Արձանագրենք, սակայն, XIV դ. սկզբում որ հայերի մահմեդականությունը ընդունումը չի եղել հաճախադեպ, գոնե հրապարակի վրա չկան կրոնափոխության այլ վկայություններ:

Աստիճանաբար հայկական սկզբնաղբյուրները կրոնական հալածանքներից առավել խոսում են ծանր հարկապահանջության մասին: Իսկ հարկ պետք էր հավաքել ավանդաբար, անգամ օտար տիրապետության պայմաններում ապահարկության իրավունք ունեցող եկեղեցիներից, ինչն էլ հայության ու հասկապես հիշատակագիրների շրջանում, որոնց մեծ մասը հոգևորական էր, մեծ դժգոհություն ու զայրույթ է առաջացնում: Ընդ որում, օգտվելով կենտրոնական իշխանության թուլացումից, տեղի պաշտոնյաները չարաշահում էին հարկեր հավաքելու իրենց լիազորությունները: 1318 թ. գրված ձեռագրում ասվում է, որ Աղթամարի Զաքարիա կաթողիկոսին հաջողվում է եկեղեցականներին չհարկելու պայմանավորվածություն ձեռք բերել մոնղոլների հետ: Չնայած դրան՝ Վասպուրական է մեկնում մոնղոլ հարկահաններից բաղկացած 1300 հոգանոց մի խումբ, որ կողոպտում է Վարազավանքն ու Վանի հարակից եկեղեցիները: Մոնղոլները հարկահանության են ենթարկում նաև տեղի մահմեդական բնակչությանը²⁵: Այսինքն՝ քրիստոնյաների դեմ մոնղոլական իշխանությունների հարուցած հալածանքների առաջնային նպատակը ոչ թե մահմեդականությունն պարտադրելն էր, այլ նրանց ունեցվածքը կողոպտելը, թեպետ, ինչ խոսք, Բլխանության վերջին տարիներին քրիստոնյաների նկատմամբ հալածանքները սաստիկ էին:

Խարբանդային հաջորդած Աբու Սայիդն (1316–1335) ու Արվիան մեղմացնում են քրիստոնյաների հալածանքները: Հայ մարդիկ հիմնականում բողոքում են ծանր հարկերից, այն է՝ գլխահարկից, որ մահմեդական իրավունքի համաձայն՝ զանձում էին ոչ մահմեդական բնակչությունից: Հիշատակարաններից մեկում ասվում է, որ «նեղեն զքրիստոնյաքս ջիզացով»²⁶: Ժամանակակիցներից մեկն էլ դիպուկ է արձանագրում եղելությունը՝ նշելով, որ «հարկ կու տանք վասն Յիսուսի»²⁷:

XIV դարի 30-ականներին, երբ Բլխանությունն արդեն իր մայրամուտն էր ապրում, շարունակվում էին քրիստոնյաների հալածանքները: 1333 թ. գրված հիշատակարանում կարդում ենք, որ մոնղոլները քանդում են եկեղեցիները²⁸: 1335 թ. Գրիգոր երեցը դժգոհում է, որ քրիստոնյաները եկեղեցի չեն գնում. «յեկեղեցոյ դուռն ոչ երթան»²⁹:

Արաբագետ Ա. Խաչատրյանը մատնանշում է հայերի մահմեդականացման մեկ այլ եղանակ, որը պայմանականորեն կկոչենք ոչ բռնի: Ըստ նրա՝ XIII–XIV դդ. երիտասարդական կամ կտրիճների և հասկապես ախի արհեստավորական կազմակերպություն-

²⁵ ԺԴ դար, էջ 138–139:

²⁶ Նույն տեղում, էջ 151:

²⁷ Նույն տեղում, էջ 226:

²⁸ Նույն տեղում, էջ 255:

²⁹ Նույն տեղում, էջ 269:

ները (համբարությունները) հող են նախապատրաստել մահմեդականցման համար: Նա կարծում է, որ տնտեսական շահերից ելնելով՝ հայ արհեստավորներն ընդունում էին մահմեդականություն: Վկայակոչելով մահմեդական պատմիչներին՝ գրում է, որ հայտնի սուֆի բանաստեղծ Ջալալեդդին Ռումին Հայաստանում մահմեդական հավատի բերեց բազմաթիվ հայ ռուսուղների՝ կտրիճների³⁰:

1385–1386 թթ. կարա կոյունլուների առաջնորդ Ղարա Մահմադը հալածում է քրիստոնյաներին, և եթե հավատանք Խաչատուր անունով հիշատակագրին՝ նա քանդել է տալիս 70 եկեղեցի³¹:

XIV դ. վերջին Արևելքը ցնցվում էր Լենկ Թեմուրի արշավանքներից: Գրիգոր Խլաթեցին իր պատմական վիպասանության մեջ, խոսելով 1387 թ. արշավանքի մասին, գրում է.

«Շատք ըգՔրիստոս ուրանային,
Եւ զՄահմետ դաւանէին»³²:

1389 թ. Աղթամարից Կարապետ գրիչը դեպքերի թարմ ազդեցությամբ գրած հիշատակարանում նկարագրում է, որ Լենկ Թեմուրի զինվորները մտնում են եկեղեցիներն ու բռնությամբ հավատափոխ անում մարդկանց. «Պղծէին զտաճարս, խորտակէին զտուփս խնկոց և հաղորդաց, ուրացուցանէին ի հաւատոյ»³³: Թեև Լենկ Թեմուրը ցանկանում էր իսլամը դարձնել աշխարհի գերիշխող կրոնը,³⁴ ու նրա նվաճումները զովեզող Շարաֆ ադ-Դին Ալի Յագիդին էլ իր «Չաֆեր-նամե»-ում նրան անվանում է «հավատի պաշտպան»³⁵, սակայն հայտնի է, որ նա քանդել է Օմայանների մզկիթը Դամասկոսում, սպանել, գերեզմարել ու որպես ստրուկ վաճառել է բազմաթիվ մահմեդականների³⁶: Հայկական աղբյուրներն էլ թեպետ Լենկ Թեմուրին կոչում էին «չար բռնաւոր ազգն մահմետական», բայց հաստատում, որ Հայաստանում նա սպանել է թե՛ հայերի, թե՛ մահմեդականների³⁷:

Թովմա Մեծոփեցին ուրախությամբ հայտնում է, որ այն հայ իշխանները, որոնք Լենկ Թեմուրի ժամանակ բռնությամբ դավանափոխ են արվել, Ղարա Յուսուֆի (1389–1420)

³⁰ Ա. Խ ա չ ա տ ը յ ա ն. Հայերի մահմեդականացումը միջնադարյան Հայաստանում (8–15-րդ դդ.) – «Իրան-Նամե», 1993, թիվ 1, էջ 26:

³¹ ԺԴ դար, էջ 562:

³² ԺԵ դարի հայերեն ձեռագրերի հիշատակարաններ, (այսուհետև՝ ԺԵ դար) մասն առաջին (1401–1450 թթ.), կազմեց՝ Լ. Խաչիկյան, Երևան, 1955, էջ 274:

³³ Տե՛ս ԺԴ դար, էջ 579:

³⁴ The Cambridge History of Iran, vol. 6, The Timurid and Safavid Periods, Cambridge, 1986, p. 89.

³⁵ Ш а р а ф а д - Д и н А л и Й а з д и. Зафар-наме. Книга побед амира Темура, пер. со староузб. А. Ахмедова. Ташкент, 2008, с. 220.

³⁶ The Cambridge History of Iran, vol. 6, p. 89. Հայկական աղբյուրների հավաստմամբ էլ՝ Թեմուրը քանդել է Դամասկոսի մզկիթները (տե՛ս ԺԵ դար, մասն առաջին, էջ 3–4):

³⁷ ԺԴ դար, էջ 569:

օրոք վերադարձել են քրիստոնեական հավատի³⁸: Չգիտենք՝ արդյո՞ք պատմագրի խոսքը կարելի է տարածել նաև Լենկ Թեմուրի ժամանակ իսլամացված հայ մարդկանց վրա, թե՛ ոչ:

XV դարում Հայաստանում հաջորդաբար իշխեցին երկու թուրքմենական ցեղեր՝ կարա կոյունլուներն և ակ կոյունլուները: Մակայն հարավային շրջանները երկրի ընդհանուր համայնապատկերից տարբերվում էին. այստեղ կային քրդական մի քանի իշխանություններ: Բաղեշում տիրապետություն էր հաստատել Ռոժկի (Ռոժակի, Ռուզակի) քրդական ցեղը, Վանում, Ոստանում ու Հաքքարիում իշխում էր հաքքարի (Շամբոյան, Շամոյան, Շամոանից, Շամո) տոհմը: Քրդեր էին հաստատվել նաև Մոկքում, Աղձնիքում և այլուր: Հայաստանի հարավային շրջաններում, որտեղ բնակություն էին հաստատել քրդերը, արձանագրվել են հայերի մահմեդական դառնալու մի քանի դեպքեր: Քանի որ դրանք կրում են դիպվածային բնույթ, նախ կներկայացնենք դրանք, սպասանդրադարձ կկատարենք թուրքմենական ցեղերի կրոնական քաղաքականությանը:

Ընդունելով թուրքմենական ցեղերի գերիշխանությունը՝ քրդական իշխանություններն ամեն պատեհ առիթի դեպքում ըմբոստանում էին՝ երկրում մշտապես լարված դրություն ստեղծելով: Քրդերն անընդհատ ավարառություն էին կատարում, կողոպտում հայ բնակչությանը: Օգտվելով կենտրոնական իշխանության թուլությունից ու թուրքմենների տիրապետության ընթացքում այդպես էլ չդադարած խռովություններից՝ նրանք հաճախ հարձակվում էին եկեղեցիների վրա: Ընդ որում, եկեղեցիների վրա հարձակվելու առաջնային մղումն ամեննին էլ կրոնական մոլեռանդությունը չէր, այլ պարզապես սպասքին ու հարստությանը տեր դառնալու տենչը:

Երկիրը հյուծվում էր նաև միջցեղային՝ Շամբոյանների ու Ռոժկիների կռիվներից: XV դ. սկզբին Բաղեշի կառավարիչ Շամս-ադ-դինը հարձակվում է Շամբոյան քրդական տան ենթակայության տակ գտնվող Շատվանի վրա և այրում այն: Ի պատասխան՝ Ամիր-Եզդինը կրակի է մատնում Բաղեշի 60 գյուղ³⁹: Դժվար չէ ենթադրել, որ այդ արշավանքներից ամենից շատ տուժում է հայ բնակչությունը:

Արդեն Բյիսանության անկումից հետո Հայաստանի հարավային շրջաններում գլուխ բարձրացրած քրդերը Աղթամարի Չաքարիա Բ կաթողիկոսից պահանջում են մահմեդականություն ընդունել⁴⁰, և մերժում ստանալով, քարկոծելով սպանում են նրան: Նույն ժամանակ քրդերը սպանում են նաև բաղեշցի մի հայի՝ կրկին մահմեդականություն ըն-

³⁸ Թ ը վ մ ա Մ ե ծ ո փ ե ց ի. Պատմագրություն, աշխատասիրությամբ Լ. Խաչիկյան, Երևան, 1999, էջ 119–120:

³⁹ Մանր ժամանակագրություններ, XIII–XVIII դդ., հ. I, կազմեց՝ Վ. Հակոբյան, Երևան, 1951, էջ 119:

⁴⁰ ԺԴ դար, էջ 600–601:

դունելու⁴¹ պահանջից հրաժարվելու պատճառով: 1398 թ. Ոստանում քարկոծելով նահատակում են մոկացի մի հայ կնոջ՝ Թամարին⁴²:

Շարաֆ-խանը քրդերին ներկայացնում է որպես ջերմեռանդ հավատացյալներ՝ նշելով, որ յուրաքանչյուր մահմեդական գյուղում, որտեղ կա երկու-երեք տուն, կառուցված է մեկական մզկիթ, իսկ մարդիկ համատեղ նամազ են անում⁴³:

Դատելով «Հայոց նոր վկաներ» ժողովածուում տեղ գտած նյութերից, համոզմունք է առաջանում, որ շատ հաճախ քրդերն են պահանջել հայերից հավատափոխ լինել: Այդ պահանջը մերժած և քրիստոնեության համար կյանքը զոհաբերած հայ նահատակներն ամենից շատ քրդական ցեղերի ենթակայության տակ գտնվող Վանից, Խլաթից, Բաղեշից, Խիզանից են: Ընդ որում, չպիտի կարծել, թե դա պայմանավորված էր տեղի քուրդ իշխանների քրիստոնյաներին կրոնափոխ անելու քաղաքականությամբ. որքան էլ քրդերն իրենց գավառների լիակատար տեր զգային, չէին կարող այս մտադրությունը կյանքի կոչել առանց թուրքմեն տիրակալների համաձայնության: Երբեմն քուրդ իշխանն ավելի հանդուրժողական էր տրամադրված քրիստոնյաների նկատմամբ, քան մահմեդական բնակչությունը: Ապրելով նույն տարածքում, կիսելով նույն առօրյան՝ հայերն ու քրդերը հաճախ էին վեճերի բռնվում: Քուրդը կարող էր ամբաստանել հային, թե հայհոյել է Մուհամմադ մարգարեին, ինչից հետո, նախ պահանջում էին հավատափոխ լինել, ապա մերժում ստանալով՝ սպանում նրան: Վիճակն ավելի էր բարդանում, երբ հայ ընտանիքի անդամներից մեկը մահմեդական էր դառնում, որից հետո պարտադրում էին նաև ընտանիքի մյուս անդամներին էլ կրոնափոխ լինել: Մոլեռանդ հոգևորականությունն ու իշխանները երբեմն հարուցում էին կրոնական հալածանքներ: Բաղեշի քրդական Ռոժլի ցեղից մեկի մասին ասվում է, որ նա ստիպում էր քրիստոնյաներին ուրանալ իրենց հավատը. «Յայնմ ժամանակի էր պարոն քաղաքին ոմն ազգաւ Քուրդ, Շամշատին անուն, և էր չարացեալ ի վերայ ազգիս Հայոց, և բռնադատէր զքրիստոնէայս՝ ուրանալ զՔրիստոս և դառնալ յօրէնս իւրեանց»⁴⁴: Բաղեշի մեկ այլ տիրակալի՝ Իբրահիմի մասին, Մեծոփեցին գրում է, որ ասում էր քրիստոնյաներին և ցանկանում էր վերացնել նրանց հավատը⁴⁵, իսկ ահա նրանից առաջ իշխող Շարաֆի մասին պատմիչն ասում է. «սիրօղ ամենայն քրիստոնէից»⁴⁶: Այսպիսով՝ մահմեդական միջա-

⁴¹ Հայոց նոր վկաները, էջ 152–164:

⁴² Մամուլ էլ Անեցի և Շարունակողներ. նշվ. աշխ., էջ 285:

⁴³ Шараф-Хан Ибн Шамсаддин Бидлиси. Шараф-Наме, т. I, пер., предисл., примеч. и приложения Е. И. Васильевой. М., 1967, с. 387.

⁴⁴ Հայոց նոր վկաները, էջ 234–235:

⁴⁵ Թնվմա Մեծոփեցի. նշվ. աշխ., էջ 111:

⁴⁶ Նույն տեղում:

վայրը ճնշող ազդեցություն էր ունենում հայության վրա: Կարծում ենք, որ վերոհիշյալ քուրդ կառավարիչների բռնություններն անհետևանք չեն անցել:

Այսուհանդերձ, քրիստոնեությունից հրաժարման գործում վճռական նշանակություն էին ունենում ինչպես պարտադրանքն ու հալածանքը, այնպես էլ ծանր հարկապահանջությունն ու սովը:

1424 թ. հայության զանգվածային մահմեդականության դեպք է գրանցվում Հայաստանի հարավային բնակավայրերից մեկում՝ Խիզանում: Ստեփանոս վարդապետն ու Պետրոս քահանան իսլամ են ընդունում, նրանց հետևում են քաղաքի շատ բնակիչներ. «Եւ շատք ի թուլամորթաց գայթակդեցան և անկան յուրացութիւն և մեծ տրտմութիւն ածին ազգիս Հայոց»⁴⁷: Հետագայում այս երկու հոգևորականները զոջում են, վերադառնում հայրենի հավատին, ինչի համար էլ նահատակվում են: Մակայն աղբյուրը լռում է և չի հաղորդում, թե արդյո՞ք հոգևորականների հետ մահմեդական դարձած հայերը կրկին քրիստոնյա են դարձել: Կարծում ենք, եթե վերադարձած լինեին քրիստոնեության, աղբյուրը կհաղորդեր այդ մասին, կներկայացներ նրանց նահատակության պատմությունը: Ընդ որում, մի քանի անգամ շեշտվում է, որ հոգևորականներին հետևել են բազում խիզանցիներ: Խիզանում այդ ժամանակ ապրում էին հայեր ու քրդեր, ուստի իմանալով XV դ. Խիզանի էթնոժողովրդագրական պատկերը՝ կարող ենք ասել, որ այս դեպքում իսլամ ընդունած հայերն աստիճանաբար քրդացել են:

1431 թ. Հայաստանում ու հարակից երկրներում մոլեզնում էր սովը: Թովմա Մեծփեցին, ներկայացնելով սովի հետևանքով սկսված աղետը, նշում է, որ Քաջբերունիքից բնակչության մի մասը հեռանում է Հայաստանի այլ վայրեր, մի մասը, տեղում մնալով, մահանում սովից: Ոմանք էլ նախընտրում են մահմեդականություն ընդունելու միջոցով փրկվել. «Եւ ոմանք գնացեալ խառնեցան ի քուրդն Բաղիշու, Մշոյ եւ Սասնոյ վասն աղքատութեան եւ սովոյն դառնութեան, եւ էլեալ ի հաւատոց դարձան ի յանհաւատութիւն՝ ավելի քան գԾ. (500) ոգի»⁴⁸: Չանգվածային կրոնափոխության այդ դեպքը, անտարակույս, աղքատության ու սովի հետևանքն էր և ճարահատ քայլ. մահմեդականության

⁴⁷ Հայոց նոր վկաները, էջ 247–248: Հետաքրքիր է, որ Հայկական լեոնաշխարհի այլ վայրերում ևս տեղի բնակչության մահմեդականության ընդունումը կապվում է հոգևոր հովիվ կրոնափոխության հետ: Ըստ հայկական ավանդության՝ Հայկական լեոնաշխարհի լեոնային շրջաններից մեկի հոգևոր հովիվ Տեր-Սիմոնը հայրենի երկիրը չլքելու ու ժողովրդին կոտորածից զերծ պահելու մտադրությամբ որոշում է ընդունել հարևան այլիների կրոնը, որին էլ հետևում է տեղի բնակչությունը: Այդ շրջանը Տեր-Սիմոնի անվամբ կոչվել է Դերսիմ (տե՛ս Գ. Հ ա լ ա ջ յ ա ն. Դերսիմի հայերի ազգագրությունը. – Հայ ազգագրություն և բանահյուսություն, հ. 5, Երևան, 1973, էջ 249–250): Հայկական ծագման մասին վկայությունը պահպանվել է նաև Դերսիմի՝ մահմեդական դարձած բնակչության շրջանում, ինչի մասին վկայում են այնտեղ այցելած ճանապարհորդի հուշերը. «Բոլորը, գեթ մեծ մասն այն կարծիքն ունին, որ իրենց նախահայրերը հայեր են» (տե՛ս Ա ն դ ր ա ն ի կ. Տերսիմ, Ճանապարհորդությունն եւ Տեղագրություն, Թիֆլիս, 1900, էջ 161):

⁴⁸ Թովմա Մեծփեցի. նշվ. աշխ., էջ 161–162:

ընդունումը թեթևացնելու էր հարկերը: Միսյա կլինի կարծել, թե նրանք դարձել են մահմեդական և հայ մնացել. բավական է ասել, որ միջնադարում ինքնության հարացույցի դերում ավելի հաճախ հանդես է գալիս «ազգն քրիստոնէից» արտահայտությունը, քան հայ ազգը:

Խիզանի, Սասունի, Բաղեշի պարագայում իսլամացումը հանգեցնում էր քրդացման, ինչի մասին էլ կարծես ակնարկում է Մեծուփեցին: Մենք չգիտենք՝ որքան ժամանակ են նրանք հայախոս մնացել, փորձ արել են արդյոք վերադառնալու քրիստոնեության, թե ոչ: Սակայն քրդական աշիրեթային կառույցի մեջ ընդգրկումը կամ դրանց հովանավորության տակ հայտնվելը գրեթե կասկած չի թողնում, որ մահմեդականացած հայերն աստիճանաբար յուրացրել են քրդական կենցաղն ու սովորությունները, մոռացել մայրենի լեզուն, դարձել քրդախոս և ձուլվել նրանց:

XV դ. սարսափելի դաժան բախտ է վիճակվում հայ ժողովրդին: Լենկ Թեմուրի որդի Շահռուխը հրամայում է իր հպատակության տակ գտնվող բոլոր երկրների քրիստոնյաներին «հանել ի հաւատոց կամ մեռանել»⁴⁹: Նրա այս քաղաքականությունը Մեծուփեցին բացատրում է ոչ թե քաղաքական նկատառումներով, այլ անձնական դրդապատճառներով⁵⁰: Քչերն են հանձն առնում մահը, մեծ մասը հավատափոխ է լինում⁵¹: Հավատափոխության այս հրամանը վերաբերում է հատկապես Սամարղանդ գերի քշված հայերին, որոնք տեղում իսլամացվում են: Բայց Շահռուխի նախաձեռնած հավատափոխության այիքը հասնում է նաև Հայաստան: 1437 թ. սներակցի Մխիթարը հայտնում է, որ Լենկ Թեմուրի որդի Շահռուխը Հայաստանում (ամենայն հավանականությամբ, խոսքը հարավային շրջանների մասին է) մարդկանց հավատափոխ է արել⁵², սակայն նրանց թվաքանակի վերաբերյալ տեղեկություններ չի հայտնում: Տիպական է Լենկ Թեմուրի հաջորդների վերաբերյալ Մեծուփեցու գնահատականը. նա Միրանշահին անվանում է «ոյժ ողորմած եւ բարերարոյ»⁵³, իսկ ահա սրա որդուն՝ Օմարին, «ատեցող ազգիս քրիստոնէից»⁵⁴:

Քրդական և թուրքական ցեղերից բացի Տարոնի կողմերում որպես իսլամադավաններ հանդես են գալիս դրվիդները (դելմիկները)՝ զազաները⁵⁵: 1463 թ. Հովհաննես եպիսկոպոսը վերանորոգում է Մշո Սուրբ Կարապետ վանքը: Շրջակայքում բնակվող դրվիդները բողոքում են, թե նա քանդել է մզկիթն ու դրա քարերով վերանորոգել այն: Հայ

⁴⁹ Նույն տեղում, էջ 36:

⁵⁰ Նույն տեղում, էջ 34–36:

⁵¹ Նույն տեղում, էջ 36:

⁵² ԺԵ դար, մասն առաջին, էջ 471:

⁵³ Թ ո վ մ ա Մ ե ծ ո փ ե ց ի. նշվ. աշխ., էջ 110:

⁵⁴ Նույն տեղում, էջ 108:

⁵⁵ Նոտարք Հայոց, հաւաքեալ եւ ի լոյս ածեալ ձեռամբ Ղեւոնդ վարդապետի Փիրդալէմեան Տոսբեցոյ Վարագայ վանուց վանականի (այսուհետև՝ Նոտարք Հայոց), Կ. Պոլիս, 1888, էջ 211:

հոգևորականին ուղարկում են Բաղեշի Շարաֆ ամիրայի մոտ, պահանջում հավատորացություն, մերժում ստանալով՝ սպանում նրան⁵⁶: Տեղին է նշել, որ քուրդ իշխաններին թուրքմեն տիրակալների տված իրավասությունների մեջ էր մտնում նաև դատական իրավունքը:

Հայերի մահմեդականացման մեկ այլ ճանապարհ էր գերեվարությունը: Չպետք է բացառել, որ տարվելով օտար երկրներ, հեռանալով հայրենի եզերքից՝ միջավայրի պարտադրանքով նրանք մահմեդական են դարձել: 1420-ական թվականներին կարա կոյունլուների առաջնորդ Իսքանդարը (1420–1438) Խիզանից, Բաղեշից և այլ վայրերից գերում է ավելի քան 500 հայի, հիմնականում կանանց և երեխաների: Նրանք քշվում են օտար երկրներ, և ինչպես վկայում է Գրիգոր Խլաթեցին՝

«Ի յայլազգիս խառնակեցան,
Ըզարութիւն նոցա ուսան.
Աւտարացան և յոռացան,
զհայրենիսն մոռացան
Ոչ ի կամաց, այլ յակամայ»⁵⁷:

Մեծուփեցին հայտնում է, որ մահմեդական հոգևորականները կարա կոյունլուների պետության ղեկավար Ջհանշահին (1436–1467) առաջարկել են հարկ ու խարաջ դնել քրիստոնյաների վրա, որպեսզի վերջիններս ուրանան իրենց կրոնը և մահմեդական դառնան: Պատմիչը հայտնում է, որ Ջհանշահը ծանր հարկեր ու խարաջ սահմանեց քրիստոնյաների վրա՝ հույս ունենալով, որ բազում «նեղութեանց դարձցին ի կրօնս իւրեանց»⁵⁸: Սակայն նրա կատարման ժամանակ՝ 1441 թ., կաթողիկոսական աթոռի վերադարձն էջմիածին ու 1465 թ. Սմբատ Մեֆեդիինյանին թագավոր օժելը բավական են փաստելու, որ նա չուներ քրիստոնյաներին հավատափոխ անելու ծրագիր: Դա վերաբերում է հատկապես երկրի հարավային գավառներին, որտեղ հաստատված քրդական ցեղերի դեմ պայքարում կարա կոյունլուների առաջնորդը, կարծես, ցանկանում էր ստանալ նաև հայերի օգնությունը: Հնարավոր է նաև, որ Ջհանշահի այս մտտեցումը որոշ չափով պայմանավորված էր ոչ միայն քաղաքական առաջնահերթությամբ, այլև կարող է որոշակիորեն կապ ունենալ նրա դավանական կողմնորոշման՝ շիա լինելու հետ: Վ. Մինորսկին գրում է, որ կարա կոյունլուները ծայրահեղ շիաներ էին, այդ պատճառով էլ օրթոդոքս պատմագրությունն ասելությամբ է լցված նրանց նկատմամբ և նրանք մեղադրվում էին հերետիկոսության մեջ⁵⁹:

⁵⁶ Հայոց նոր վկաները, էջ 299–303:

⁵⁷ ԺԵ դար, մասն առաջին, էջ 285:

⁵⁸ Թ ն վ մ ա Մ ե ծ ն փ ե ց ի. նշվ. աշխ., էջ 215–216:

⁵⁹ V. M i n o r s k y. La Perse au XV^e siecle entre la Turquie et Venise, Paris, 1933, p. 4.

Խիզանում գրված հիշատակարաններից մեկը դիպուկ բնորոշում է ոչ քրիստոնյա տիրակալների վերաբերյալ տիրող դարաշրջանի մտածողությունը: Այսպես, հիշատակագիրը գովում է Ջհանշահին՝ ասելով, թե նրա օրոք բազմաթիվ եկեղեցիներ են կառուցվել ու նորոգվել, և խաղաղություն էր տիրում Հայոց աշխարհում: Տպավորություն կարող է ստեղծվել, թե երկրում, իսկապես, հանգստություն էր ու անդորր, այնինչ նույն գրիչը նշում է, որ Ջհանշահի գործը գերել է և սպանել մարդկանց, ավերել գավառներ ու երկրում սով էր⁶⁰: Նա պարզապես նկատի ունի, որ Ջհանշահը քրիստոնյաներին իրենց կրոնի համար չի հալածում և միայն դրա համար է դրվատանքի խոսքերի արժանացնում: Կա նաև հարցի հակառակ երեսը. հաճախ հայ հիշատակագիրները հայտնում են, որ այս կամ այն տիրակալը սպանում կամ կողոպտում է քրիստոնյաներին, ինչը, սակայն, դեռ չի նշանակում, թե այդպես է վարվում, որովհետև մահմեդական է:

Կառավարման սկզբնական շրջանում հայերին կրոնական հալածանքների ենթարկելու շեշտված քաղաքականություն չէր որդեգրել թուրքմենական մյուս ցեղի՝ ակ կոյունյունների տիրակալ Ուզուն Հասանը (1453–1478): Վերջիններս, ի տարբերություն կարա կոյունյունների, սունիներ էին: Ըստ Հ. Մանանդյանի՝ Ուզուն Հասանը հանդուրժողական վերաբերմունք ուներ հայերի նկատմամբ⁶¹: Բաղեջի Շարաֆյան տոհմի դեմ արշավանքի ժամանակ նա կոտորում է բազում քրդերի և հայերին չի գերում. «Հայոց ազգիս յոյժ ողորմած է, զի գերի ոչ առնէ»⁶²: Բայց սա ամեննին չի նշանակում, թե Ուզուն Հասանը հատուկ համակրանք էր տաժում քրիստոնյաների նկատմամբ: Նրա վերաբերմունքը պայմանավորված էր լուրջ քաղաքական առաջնահերթությամբ. նա ցանկանում էր քրդական իշխանություններին ճնշելու գործում հայերի համակրանքը, միգուցե նաև օժանդակությունը ստանալ: Այն, որ հայերի նկատմամբ նման դիրքորոշումն աղերս չունեի վերջիններիս կրոնական պատկանելության հետ ու բացառապես թուրքմենական իշխանության ռազմաքաղաքական շահերի արտահայտությունն էր, հաստատվում է Ուզուն Հասանի՝ Վրաստան կատարած արշավանքով, որի ժամանակ բազմաթիվ եկեղեցիներ են քանդվում⁶³:

Ի. Պետրուշևսկին գրում է, որ 1468 թ. կարա կոյունյուններին պարսության մատնելուց հետո Ուզուն Հասանը սկսեց հենվել մահմեդական հոգևորականության վրա: Հատուկ հարգանք տաժելով դազիների, ուլեմաների ու մահմեդական հոգևորական այլ ներկայացուցիչների նկատմամբ՝ նա Թավրիզում և այլ քաղաքներում կանգնեցրեց մզկիթներ ու մադրասաներ, ինչպես նաև մահմեդական հոգևորականությանը սոյուր-

⁶⁰ ՄԵ դար, մասն երկրորդ, էջ 271:

⁶¹ Հ. Մանանդյան. Երկեր, հ. Գ, Երևան, 1977, էջ 411:

⁶² ՄԵ դար, մասն երկրորդ, էջ 365:

⁶³ Նույն տեղում, էջ 425:

դալներ (շնորհում, պարգևում, թուրքմենական պետությունների կողմից տրվող ժառանգական կալվածքներ) տվեց⁶⁴:

Պատահական չէ, որ արդեն Ուզուն Հասանի կառավարման վերջին տարիներին հայ հիշատակագիրները բողոքում են հարկապահանջությունից. «Յամենայն կողմանց նեղեն և չարչարեն զազգս քրիստոնէից ազգն տաճկաց. ի հարկապահանջութիւն, ի գերութիւն, ի սով, ի սուր և յայլ ազգի ազգի վիշտս և ի տառապանս նեղիմք»⁶⁵: Բացի այդ, հայտնում են, թե նա կապույտ նշան է դրել քրիստոնյաների վրա, արգելել եկեղեցու զանգերի դողանջը⁶⁶: Մի հիշատակարանում ասվում է, որ Ուզուն Հասանը ոսկի և արծաթ է պահանջել հայերից ու հրամայել հատուկ նշաններ կրել⁶⁷ մահմեդականներից տարբերվելու համար: Չի բացառվում, որ քրիստոնյա հպատակները ծանր հարկերից ազատվելու նպատակով մահմեդականություն են ընդունել կամ որ ավելի հավանական է՝ ներկայացել որպես մահմեդական, և այդ միտումը կանխելու համար է, որ Ուզուն Հասանը պարտադրել է տարբերակիչ նշաններ կրել⁶⁸: Թեպետ մեր ձեռքի տակ հայերի մահմեդականություն ընդունելու վերաբերյալ տեղեկություններ չկան, սակայն չի բացառվում, որ նման դեպքեր եղել են:

Քրիստոնյաների նկատմամբ քաղաքականությունն ավելի է խստացնում Ուզուն Հասանի որդին՝ Յադուբը (1478–1490), թեպետ նրա կառավարման սկզբում՝ 1481 թ., վերանորոգվում է Կոտուց կղզու Սուրբ Կարապետի գմբեթը: Ուշագրավ է, որ գմբեթի կառուցումը մահմեդականները խիստ դժգոհությամբ են ընդունում, ինչպես նշում է ժամանակակիցներից մեկը՝ կրճատացնում էին ատամները⁶⁹: Աղբակի Էրնկանի գյուղում 1483 թ.

⁶⁴ И. П. Петрушевский. Очерки по истории феодальных отношений в Азербайджане и Армении в XVI – начале XIX вв. Л., 1949, с. 150.

⁶⁵ ՏԵ դար, մասն երկրորդ, էջ 397:

⁶⁶ Նույն տեղում, էջ 394: Այն, որ ընդամենը մեկ հիշատակարան է հայտնում Ուզուն Հասանի կողմից զանգերի դողանջի արգելքի ու տարբերակիչ նշան դնելու մասին, փոքր-ինչ տարակուսանք է առաջացնում: Մյուս գրիչները խոսում են ծանր հարկերի մասին, սակայն եկեղեցու զանգերի դողանջի ու նշանի մասին լռում են: Հետաքրքիր է, որ 1476 թ. խոսվում է Վանի սուրբ Պողոս եկեղեցու գմբեթի ու ժամատան վերականգնման մասին (տե՛ս նույն տեղում, էջ 403–407):

⁶⁷ Նույն տեղում, էջ 394:

⁶⁸ 1441 թ. Մեքաստիայի Մարզվան գավառի Խտրշան բնակավայրում տեղի ունեցած անչափ հետաքրքիր մի անցքի վերաբերյալ պահպանվել է վկայություն, որը ցույց է տալիս, որ հայերը, հագնվելով մահմեդականներին բնորոշ ձևով կամ կրելով սոսկ մի ասորիբուս, կարող էին անձանաչելի լինել անձանոթների կողմից: Այսպես, մահմեդականները ճանապարհ գնալիս չեն հասկանում, որ անցորդը ոչ թե թուրք է, այլ հայ, քանի որ նա գլխին ձերմակ փաթոց ուներ: Դեպքը բացահայտվելուց հետո քրիստոնյաներին հրամայվում է չկրել ձերմակ փաթոց. «Եւ յայնմ օրէ զձերմակ չալման վերացուցին ի գլխոց քրիստոնէից» (տե՛ս Ս ա մ ու է լ Ա ն է ց ի և Շ ա ր ու ն ա կ ո ղ ն է ր, էջ 290):

⁶⁹ ՏԵ դար, մասն երրորդ, էջ 12:

գրված հիշատակարանում կարդում ենք. «Ի յայսմ ամի նշան դրին քրիստոնէիցս, և զժամ զարնուլն խափանեցին»⁷⁰: Յաղութն արգելում է նաև քրիստոնյաներին ձի հեծնել, նրան անվանում են քրիստոնյաների հալածող: Հայ հիշատակագիրները վկայում են, որ նրա հրամանով եկեղեցիներ են քանդվել⁷¹: Յաղութի ժամանակ այնքան վատ էր մարդկանց դրությունն ու այնքան ծանր հարկապահանջությունը, որ մարդիկ անգամ սեփական մահն էին կամենում⁷²: Փորձելով ամրապնդել շարիաթի օրենքները՝ նա սոյուրդալներ է բաժանում մահմեդական հոգևորականությանը⁷³: Ուշագրավ է Յաղութի կառավարման տարիներին տեղի ունենցած հետևյալ դրվագը. Կոտայքում 40 հայ ազատորդիներից պահանջում են մահմեդական դառնալ, սակայն նրանք հրաժարվում են ու կարողանում խուսափել մահից⁷⁴: Ճիշտ է նկատում Հ. Մանանդյանը՝ գրելով, որ առաջին հերթին ազնվականներից ու ականավոր անձանցից էին պահանջում մահմեդական դառնալ⁷⁵:

Չենք կարող ասել՝ Վանում իսլամ ընդունելու համաժամանակյա դեպքը կապված է Յաղութի քաղաքականության հետ, թե՛ ոչ: Հայերեն ձեռագրերի հիշատակարաններում հենց նրա կառավարման տարիներին է կրկին երևան գալիս դեռ Մուհամմադ Խարբանդայի ժամանակներից հայտնի քրիստոնյաների հալածքների մասին պատմող վերը հիշված արտահայտությունը, որ ցուցիչ է, որ նրա կառավարման տարիներին քրիստոնյաների նկատմամբ հալածանքները խստացել էին: Շատ դեպքերում իսլամ պարտադրողի դերում կարող էին հանդես գալ թուրքմենական ավագանին, տեղական կառավարիչները, մահմեդական բնակչությունը: Հայտնի է, որ Թավրիզում Յաղութը սպանում է ազգությամբ հայ Խոջա Միրաքին նահատակողներին, որոնք պահանջել էին նրանից մահմեդական դառնալ: Նա պատժում է նաև մոլեռանդ մահմեդականներին, որոնք Միրաքի նահատակությունից հետո փորձել էին քանդել հայկական եկեղեցին⁷⁶: Տպավորություն է ստեղծվում, որ շիիզմին հակված կարա կոյունլուները և սուննիզմին հարող ակ կոյունլուները չունենին այն ընդգծված կրոնական քաղաքականությունը, ինչին ականատես էինք դառնալու հաջորդ դարերի ընթացում, երբ ասպարեզ էին իջնելու Մեֆյաններն ու օսմանցիները: Այսինքն՝ նրանք հանդես չէին գալիս բացառապես իսլամի երկու ճյուղերից մեկի պաշտպանությամբ, որպեսզի կարողանային իրենց շուրջ համախմբել կրոնական տարբեր հայացքներ ունեցող թուրքմենական ցեղերին: Կարծում

⁷⁰ Նույն տեղում, էջ 50:

⁷¹ Նույն տեղում էջ 145:

⁷² Նույն տեղում, էջ 98:

⁷³ И. П. Петрушевский. Նշվ. աշխ., էջ 150:

⁷⁴ ՏԵ դար, մասն երրորդ, էջ 110:

⁷⁵ Հ. Մանանդյան. նշվ. աշխ., էջ 413:

⁷⁶ Նույն տեղում, էջ 412–413:

ենք՝ քաղաքական առաջնահերթությամբ էր պայմանավորված նաև քրիստոնյանների նկատմամբ նրանց վերաբերմունքը:

XV դարի ընթացքում, բացի զանգվածաբար մահմեդական դառնալու վերաբերյալ մի քանի տեղեկություններից, հայտնի են հայ անհատների կողմից իսլամ ընդունելու մասին հատուկենտ վկայություններ: Դարասկզբին Վանում մահմեդական է դառնում Սիրանոս անունով մեկը. «ԳՔրիստոս ուրացաւ և տաճկացաւ»⁷⁷: Ավելի ուշ Խիզանում իսլամ է ընդունում մի հայ կին⁷⁸, այնուհետև քրիստոնեությունից հրաժարվում է Մուրաստ Վանեցու հայրը⁷⁹:

Իսլամացման կարող էր հանգեցնել նաև մահմեդականների հետ ամուսնությունը, թեև աղբյուրներն այս առումով սակավախոս են: Մանր ժամանակագրություններից մեկում ասվում է, որ քրդերն առնանգել են Շամսա անունով մի հայ կնոջ⁸⁰: Հիշատակարաններից մեկից հայտնի է, որ մի հայ կին ամուսնանում է մահմեդականի (քուրդ) հետ, սակայն հրաժարվում է մահմեդականություն ընդունել, ինչի պատճառով ամուսնու ազգականները նրան սպանում են⁸¹:

Կային հայ հոգևորականներ, որոնք հավատարիմ իրենց առաքելությանը՝ քրիստոնեություն էին քարոզում նաև մահմեդականներին: Այդպիսի դժվարին պարտակալություն էր իր ուսերին վերցրել Գրիգոր վարդապետը⁸²:

XV դարի հայ իշխանական տների որոշ անդամներ հավատափոխ են եղել իրենց հողատիրական իրավունքը պահպանելու նպատակով⁸³: Նրանց համար հատկապես բացասական նշանակություն է ունեցել «բեյթ-ուլ-մալ»-ի ինստիտուտը, որը հաճախ հանգեցնում էր հայ իշխանների տիրույթների բռնագրավմանը հոգուտ մահմեդական համայնքի⁸⁴: Այս երևույթը նախնառաջ վերաբերում է Հայաստանի հյուսիսարևելյան շրջաններին: Հարավարևմտյան Հայաստանի իշխանական տների՝ մահմեդական դառնալու մասին մեզ սկզբնաղբյուրային վկայություններ հայտնի չեն: Այդ մասին ակնարկային ու որոշակի տվյալներ են հայտնվում հետագա դարերում, մի մասն էլ սոսկ ենթադրություններ են և, ըստ երևույթին, բարեմիտ հորինվածքներ, ու դուրս են քննարկվող նյութի շրջանակից:

⁷⁷ Հայոց նոր վկաները, էջ 200:

⁷⁸ Նույն տեղում, էջ 309:

⁷⁹ Նույն տեղում, էջ 320:

⁸⁰ Տե՛ս Մայր ցուցակ ձեռագրաց Սրբոց Յակոբեանց, հ. V, կազմեց Նորայր եպս. Պողարեան, Երուսաղեմ, 1971, էջ 97:

⁸¹ Նոտարք Հայոց, էջ 47–48:

⁸² Թ՜ ն վ՜ մ՜ ա՜ Մ՜ ե ծ՜ ն փ՜ ե ց՜ ի. նշվ. աշխ., էջ 94:

⁸³ Ա. Տե՛ր - Ղևոնդյան. Մահմեդական ամիրությունների բացասական դերը միջնադարյան Հայաստանի ճակատագրում. – Հողվածների ժողովածու, Երևան, 2003, էջ 614:

⁸⁴ Հ. Դ. Փափագյան. «Բեյթ-ուլ-մալ»-ի ինստիտուտը և հայ ֆեոդալների հողերի բռնագրավումները XV դարում. – ՊԲՀ, 1958, - 2, էջ 193–203:

Տ. Դալայանը հմտորեն ցույց է տալիս, որ Հարավարևմտյան Հայաստանի իշխանական տների անվանումները պահպանվել են քրդական ցեղանուններում: Ուշագրավ է, որ այդ քրդական ցեղերի բնակության արեալն մեծ ի մասամբ համընկնում է հայ իշխանական տների տիրույթների հետ⁸⁵: Լիովին համամիտ ենք հեղինակի այն եզրահանգմանը, ըստ որի՝ բոլոր դեպքերում չպիտի տեսնել ծագումնաբանական ընդհանրությունն. «Մրանից, անկասկած, չի հետևում, թե թվարկված բոլոր դեպքերում կարելի է ծագումնաբանական ընդհանրություններ տեսնել ներկա և նախկին ցեղային իրադրությունների միջև. ամենևին ոչ: Պարզապես ուշագրավն այն է, թե ինչպիսի կենսունակություն են դրսևորել հին ցեղանուններն ու տոհմանունները՝ անգամ տարածաշրջանի էթնիկ, վարչական և կրոնամշակութային իրադրության փոփոխության պայմաններում»⁸⁶:

Այսպիսով՝ կարող ենք արձանագրել, որ թեպետ XIV–XV դդ. հայության մահմեդականացումը զանգվածային բնույթ չի կրել, և չկան որևէ գավառի ամբողջական մահմեդականացման դեպքեր, այնուհանդերձ, պատմության էջերում արձանագրված են հայերի թե՛ անհատական, թե՛ խմբային իսլամացման օրինակներ:

Ի մի բերելով առկա տվյալները՝ գալիս ենք այն համոզման, որ հատկապես XV դ. ուժերից վեր հարկերն ու սուլն են հայերի մահմեդականացման հիմնական պատճառները:

Հետաքրքիր է, որ երբեմն ուղղակի կամ անուղղակի կերպով մատենագիրներն իսլամ ընդունելն ու երկրից հեռանալը հակադրում են իրար: Տպավորություն է ստեղծվում, որ հալածանքների ու տնտեսական ծայրահեղ վատ դրության հետևանքով ժողովուրդը երկրնտրանքի առաջ էր. կա՛մ մահմեդականություն ընդունելով ապրել հայրենի եզերքում, կա՛մ օտար ավերում փնտրել բախտը: Այսպիսով՝ պետության բացակայության պայմաններում հայությունից առանձին բեկորներ միշտ էլ պոկվել են՝ ձուլվելով այլ ժողովուրդներին, մասնավորապես, քրդերին և թուրքերին: Հայաստանի հարավային շրջանների օրինակով կարող ենք փաստել՝ մահմեդականացումն երկրի էթնոժողովրդագրական պատկերի փոփոխության վրա թեպետ ոչ վճռական, սակայն որոշակի ազդեցություն ունեցել է, քանի որ իսլամացումն օտարացում էր էթնիկ ակունքներից ու հանգեցնում էր քրդացման:

Ժամանակակիցները քրիստոնեությունից հրաժարումն ու մահմեդականության ընդունումը դիտարկել են միմիայն որպես ուրացություն և դավաճանություն: Այնուհանդերձ, նկատելի է, որ մահմեդականություն ընդունելու մասին մատենագիրները հարդորդում են ավստասանքով ու ցավով՝ հասկանալով, որ հայության մեծ մասը հարկադրված է այդ քայլին գնացել: Ինչքան էլ «գայթակղիչ լիներ» մահմեդական դառնալը՝ հայ ժողովրդի գերակշիռ մասը չի հրաժարվել քրիստոնեությունից, հետևաբար և ազգութ-

⁸⁵ Տե՛ս Տ. Դալայան. Հայ իշխանական տների հետքերը Հարավարևմտյան Հայաստանում (քրդական որոշ ցեղանունների և ցեղերի ծագման հարցի շուրջ). – ՊԲՀ, 2004, -2, էջ 174–196:

⁸⁶ Նույն տեղում, էջ 195:

յունից՝ մնալով Հայաստանի հարավային շրջանների բնակչության ճնշող մեծամասնությունը:

СЛУЧАИ НАСИЛЬСТВЕННОЙ ИСЛАМИЗАЦИИ АРМЯН И ПРИНЯТИЯ ИМИ
МАГОМЕТАНСТВА В XIV–XV ВЕКАХ
(На примере южных областей Армении)

ГОР ЕРАНЯН

Резюме

В XIV–XV веках в южных областях Армении доминирующая часть армянского народа не отказалась от христианства, тем не менее, в вышеуказанном периоде зафиксированы случаи как индивидуального, так и группового обращения армян в ислам. Причинами принятия магометанства явились голод, тяжелые налоги, а также угнетение и принуждение со стороны магометан. В южных округах Армении, где в качестве магометан были представлены курды, исламизация привела к курдификации и в некоторой степени повлияла на этнодемографическую картину страны.

THE CASES OF FORCIBLE ISLAMIZATION AND CONVERSION TO MUSLIM OF THE
ARMENIANS IN THE 14th–15th CENTURIES
(On the example of the Southern regions of Armenia)

GOR YERANYAN

Summary

In the 14th–15th centuries in the Southern regions of Armenia most of the Armenians never abandoned Christianity, but there were reported cases of individual and group level Islamization of the Armenians. The reasons for Muslimization were famine, heavy taxes, as well as prosecutions and enforcements. In the Southern regions of Armenia where the Kurds were representatives of Muslim, the Islamization led to Kurdisation and partially affected on the ethno-demographic image of the country.